

Minister Geoffrey Wever:

Gobierno lo continua su colaboracion cu Qredits Aruba pa yuda empresarionan local

**Lo yuda un total di 50 empresa chikito y mediano haya un "recovery / investment loan"*



ORANJESTAD (AAN): minister Geoffrey Wever, Diaranson durante un reunion publico den Parlamento di Aruba a ser aproba e Ontwerp Landsverordening pa apodera minister di asunto economico, pa empresa chikito y

mediano.

Esaki ta prueba cu Gobierno ta traha hunto cu sector priva pa empodera empresanan chikito, crea cuponan di trabow y stimula entrepreneurship. Basa

riba e cooperacion aki Qredits ta pone Afl. 1.200.000 pa financia mas o menos 50 compania chikito cu un interes reduci di 5.75%.

E cooperacion entre Ministerio di Asuntonan Economico y Qredits Aruba tambe a percura pa a duna 80 persona e posibilidad pa participa na e "Small Business Academy". Tambe tabata tin e posibilidad pa hobennan participa na e programa di "Be Your Own Boss". Ambos programa ta diseña pa educa empresarionan actual y di futuro.

Durantepandemia mester a busca manera

pa yuda empresanan chikito y mediano den un forma rapido, mirando e situacion extraordinario, pa cual no tabata tin tempo pa warda. E tempo ey un schenking a ser duna na Qredits, pa cual e ayudo financiero aki a ser traspassa pa mas di 100+ compania pa yuda nan tene nan cabes riba awa.

Minister Wever a indica di "no por haci politica cu e hecho aki, y nos ta contento cu e asistencia cu a ser brinda na un momento hopi dificil na empresarionan chikito y mediano". E mandatario ta contento cu Parlamento a duna su aprobacion.

Un enseñansa cu hulandes como e unico idioma di instruccion

Aruba a hereda un sistema di enseñansa obsoleto, pero nada no a cambia te dia di awe

ORANJESTAD (AAN): Dr. Joyce Pereira, di Fundacion Lanta Papiamento, durante un lectura den cuadro di Dia di Idioma Materno realisa na Fundacion Rancho, a duna di conoce cu dia cu Aruba a haya su autonomia na 1954, gobierno a bay di acuerdo pa carga tur responsabilidad pa loke ta enseñansa.

El a agrega cu esaki ta algo cu a resulta masha dificil mes. A hereda un sistema di enseñansa cu na e momento ey tabata existi casi 140 aña caba. Tur frustia, obsoleto, pero e tabata tey ainda, a remarca.

E enseñansa aki tabata tin masha hopi problema cu for di cuminsamento tabata conoci. Pero nunca no a haya e atencion necesario. Un enseñansa cu idioma di instruccion na hulandes como e unico idioma di instruccion. Hulandes cu pa mayoria alumno tabata y ta ainda un idioma stranhero cu e no ta tende niun caminda, na scol so, a bisa. Hopi hende a critica e sistema aki, Joyce Pereira a señala.

Pero nada no a cambia te dia di awe, a expresa. Tin algun intento, pero el a keda na intento. E hecho ta cu tin un enseñansa cu



semper a ignora e idioma di mayoria di alumno, esta Papiamento. Y cu semper a duna mas balar na otro idioma. Hulandes, Ingles, Spaño y hasta Frances tabata semper den e enseñansa na Aruba, cu excepcion

di Papiamento, e idioma di pueblo.

Dr. Joyce Pereira a sigui bisa cu te hasta ta asina cu a haya un documento di notario cu ta data di siglo 19 y a keda copia, copia y djis cambia e sistema di

imprenta y tin'e te dia di awe cu ta bisa cu tur documento di notario mester ta na hulandes of cualquier otro idioma, pero no den e idioma di e pais, esta Papiamento y nan ta uz'e te dia di awe, a remarca.